



NOTULE VAN 'N GEWONE VERGADERING VAN DIE SWARTLAND MUNISIPALE RAAD GEHOU IN DIE RAADSAAL, MALMESBURY OP DONDERDAG, 30 OKTOBER 2025 OM 10:00

TEENWOORDIG:

Speaker, rdh M A Rangasamy
Uitvoerende Burgemeester, rdh J H Cleophas
Uitvoerende Onderburgemeester, rdd J M de Beer

RAADSLEDE:

Bess, D G (DA)	Pieters, C (ANC)
Booyesen, A M (VF+)	Pypers, D C (DA)
Gaika, M F (EFF)	Smit, N (DA)
Jooste, R J (DA)	Van Essen, T (DA)
Nel, M (DA)	Vermeulen, G (VF+)
Ngozi, M (ANC)	Warnick, A K (DA)
O'Kennedy, E C (DA)	Williams, A M (DA)
Papier, J R (GOOD)	White, G E (PA)
Penxa, B J (ANC)	

Beampes:

Munisipale Bestuurder, mnr J J Scholtz
Direkteur: Siviele Ingenieursdienste, mnr L D Zikmann
Direkteur: Elektriese Ingenieursdienste, mnr T Möller
Direkteur: Beskermingsdienste, mnr H Witbooi
Direkteur: Korporatiewe Dienste, me M S Terblanche
Senior Bestuurder: Begrotingskantoor, me H Papier
Bestuurder: Sekretariaat en Rekords, me N Brand

1. OPENING

Die Speaker verwelkom die Uitvoerende Burgemeester, raadsdames, raadshere, raadslede, amptenare en lede van die publiek.

Me H Koopman, 'n amptenaar van die Departement: Korporatiewe Dienste, open die vergadering met skriflesing en gebed op uitnodiging van die Speaker.

Die Speaker dra sy gelukwense oor aan raadslede en amptenare wat die afgelope tyd verjaar het.

Die Speaker simpatiseer met raadslede en amptenare wat die afgelope tyd geliefdes aan die dood afgestaan het.

2. VERLOF TOT AFWESIGHEID

Verlof tot afwesigheid word verleen aan rdle C Fortuin, I S le Minnie en P E Soldaka, die Direkteur: Ontwikkelingsdienste, me J S Krieger en die Direkteur: Finansiële Dienste, mnr M Bolton.

3. AFVAARDIGINGS/VERKLARINGS EN MEDEDELINGS/VOORLEGGINGS

3.1 SPESIALE RAADSVERGADERING, 3 DESEMBER 2025

KENNIS WORD GEGEE deur die Speaker van 'n Spesiale Raadsvergadering geskeduleer vir Woensdag, 3 Desember 2025 om 10:00

3.2 TOEKENNINGS ONTVANG DEUR SWARTLAND MUNISIPALITEIT

Die Munisipale Bestuurder gee agtergrond tot die onlangse toekenning wat deur Swartland Munisipaliteit ontvang is, naamlik:

- (1) *MIRA (Municipal Innovation Recognition Award)* – 3de plek toekenning vir die beoordeling van die Highlands Stortingsterrein;
- (2) *Cape Chamber's Award* – toekenning vir die mees innoverende projek vir die omgewing wat deur die Munisipaliteit geskep is vir die ontwikkeling van die Crestcare Hospitaal en De Zwartland Markt met gepaardgaande werkskepping;
- (3) *Premier's Awards* – verskeie toekennings in bepaalde kategorieë;
- (4) *Auditor General's Award* – vir die verkryging van 'n skoon oudit vir die vorige finansiële jaar;
- (5) *Ratings Afrika/SAPOA (South Africa Property Owners' Association)* – gesamentlike wenner met Saldanhabaai Munisipaliteit as mees finansiële volhoubare munisipaliteite.

Die Munisipale Bestuurder beklemtoon dat die toekennings die resultaat is van die Munisipaliteit se strewe om te doen wat vanaf 'n plaaslike owerheid verwag word en om die gemeenskap met integriteit, toewyding en uitnemendheid te dien. Die eerbewyse is die gevolg van 'n gesamentlike poging, 'n gedeelde visie en toewyding om die regte kultuur te skep.

Rdl B J Penxa spreek sy dankbaarheid uit teenoor die toekennings en om deel te wees van die gesamentlike poging en kultuur. Kommer word egter uitgespreek teenoor die toenemende misdaad in die Swartland munisipale area en die gebrek aan dienslewering deur Provinsiale en Nasionale Departemente, bv. daar is geen vordering met die oprigting van die nuwe hospitaal nie, die behoefte aan 'n Satelliet Polisiestasie tussen Ilinge Lethu en Saamstaan is herhaaldelik onder die aandag van die Suid-Afrikaanse Polisie (SAPD) gebring, maar geen ondersteuning word vanaf die SAPD verkry nie.

Rdl Penxa noem dat die publiek verkeerdelik die Munisipaliteit blameer vir hierdie swak dienslewering en gebrek aan ondersteuning vanaf Provinsiale en Nasionale Departemente.

VIR KENNISNAME

4. NOTULES VIR BEKRAGTIGING

4.1 NOTULE VAN 'N GEWONE RAADSVERGADERING GEHOU OP 31 JULIE 2025

BESLUIT

(op voorstel van rdl A K Warnick, gesekondeer deur rdl E C O'Kennedy)

Dat die notule van 'n Gewone Raadsvergadering gehou op 31 Julie 2025 goedgekeur en deur die Speaker onderteken word.

4.2 NOTULE VAN 'N GEWONE RAADSVERGADERING GEHOU OP 27 AUGUSTUS 2025

BESLUIT

(op voorstel van rdd M Nel, gesekondeer deur rdl D C Pypers)

Dat die notule van 'n Gewone Raadsvergadering gehou op 27 Augustus 2025 goedgekeur en deur die Speaker onderteken word.

5. VERSLAGDOENING INSAKE GEDELEGEERDE BESLUITNEMING DEUR DIE UITVOERENDE BURGEMEESTER

BESLUIT

Dat kennis geneem word van die Uitvoerende Burgemeester se besluite ingevolge gedelegeerde bevoegdheid, soos vervat in die onderstaande notules:

5.1/...

- 5.1 NOTULE VAN 'N GEWONE VERGADERING VAN DIE UITVOERENDE BURGEMEESTERSKOMITEE GEHOU OP 17 JULIE 2025
- 5.2 NOTULE VAN 'N GEWONE VERGADERING VAN DIE UITVOERENDE BURGEMEESTERSKOMITEE GEHOU OP 21 AUGUSTUS 2025
saamgelees met
NOTULES VAN PORTEFEULJEKOMITEEVERGADERINGS GEHOU OP 13 AUGUSTUS 2025
- 5.3 NOTULE VAN 'N GEWONE VERGADERING VAN DIE UITVOERENDE BURGEMEESTERSKOMITEE GEHOU OP 17 SEPTEMBER 2025
saamgelees met
NOTULES VAN PORTEFEULJEKOMITEEVERGADERINGS GEHOU OP 10 SEPTEMBER 2025

6. VERSLAGDOENING INSAKE GEDELEGEERDE BESLUITNEMING DEUR DIE MUNISIPALE BESTUURDER

BESLUIT

Dat kennis geneem word van die Munisipale Bestuurder se besluite ingevolge gedelegeerde bevoegdheid, soos vervat in die onderstaande notules:

- 6.1 NOTULE VAN 'N VERGADERING VAN DIE BODBEOORDELINGSKOMITEE GEHOU OP 23 JULIE 2025
- 6.2 NOTULE VAN 'N VERGADERING VAN DIE BODBEOORDELINGSKOMITEE GEHOU OP 8 AUGUSTUS 2025
- 6.3 NOTULE VAN 'N VERGADERING VAN DIE BODBEOORDELINGSKOMITEE GEHOU OP 18 AUGUSTUS 2025
- 6.4 NOTULE VAN 'N VERGADERING VAN DIE BODBEOORDELINGSKOMITEE GEHOU OP 3 SEPTEMBER 2025
- 6.5 NOTULE VAN 'N VERGADERING VAN DIE BODBEOORDELINGSKOMITEE GEHOU OP 22 SEPTEMBER 2025

7. SAKE VOORTSPRUITEND UIT DIE NOTULES

Geen.

8. SAKE VIR BESPREKING

8.1 MOONTLIKE IMPLEMENTERING VAN DIE WET OP DIE ADMINISTRATIEWE BEOORDELING VAN PADVERKEERSOORTREDINGS (AARTO) BINNE DIE SWARTLAND MUNISIPALITEIT (17/6/B)

Die Munisipale Bestuurder gee agtergrond tot die moontlike implementering van die Wet op die Administratiewe Beoordeling van Padverkeersoortredings (AARTO) waarvan die publieke deelnameproses reeds in Oktober 2020 afgehandel is. Verder word verwys na die vereiste om 'n diensvlakkooreenkoms met die Suid-Afrikaanse Poskantoor aan te gaan.

Die Munisipale Bestuurder beklemtoon van die bekommernisse rakende die implementering van AARTO met ingang van 1 Desember 2025, onder meer die betrokkenheid van die Suid-Afrikaanse Poskantoor (wat onder sakeredding geplaas is), die feit dat daar geen begroting vir die implementering van AARTO beskikbaar is nie (weens die afkondiging wat in Augustus 2025 gedoen is, buite die plaaslike regering se begrotingsiklus), die verlies aan inkomste, regulasies wat nog gepromulgeer moet word, die gereedheid van die "back office", ensovoorts.

Die Munisipale Bestuurder meld die stappe wat deur die Stad Kaapstad geneem gaan word om 'n interregeringsdispuut te verklaar, asook om 'n interdik te bekom vir die uitstel van die implementering van AARTO tot 'n latere datum as 1 Desember 2025, en dat Swartland Munisipaliteit hierdie stappe ondersteun.

Die Speaker bring die moontlike implementering van AARTO in die Swartland Munisipaliteit met ingang van 1 Desember 2025 tot stemming en word –

EENPARIGE BESLUIT

(op voorstel van rdl A K Warnick, gesekondeer deur rdl G Vermeulen)

- (a) Dat kennis geneem word dat 'n hersiene konsep-diensvlakoooreenkoms, wat tussen die Munisipaliteit en die Suid-Afrikaanse Poskantoor (SAPO) gesluit moet word, op 26 Januarie 2024 van die Padverkeersoortredingsagentskap (RTIA) ontvang is;
- (b) Dat daar van die volgende bekommernisse met betrekking tot die konsep-diensvlakoooreenkoms wat met SAPO gesluit moet word, kennis van geneem word, naamlik:
 - (i) Dat verskeie verpligtinge rakende die verwerking van data op die RTIA geplaas word, wat nie 'n party tot die ooreenkoms is nie. Die afdwingbaarheid daarvan is dus nie moontlik nie, en die Munisipaliteit sal geen regsmiddel hê in geval van wanprestasie deur die RTIA nie;
 - (ii) Dat geen voorsiening gemaak word vir 'n rekonsiliasie van oortredingskennisgewings wat deur die uitreikingsowerheid uitgereik en deur die RTIA aan SAPO gestuur word, en die betaling van enige bedrae wat aan die uitreikingsowerheid verskuldig is nie. Dit kan moontlik lei tot die verlies van inkomste vir die Munisipaliteit en wanbestuur van fondse;
 - (iii) Dat kennis geneem word dat die Munisipaliteit slegs 'n kwartaallikse verslag oor die opsporingsresultate van kennisgewings wat deur SAPO gestuur is, sal ontvang;
 - (iv) Dat daar kennis geneem word dat die konsep diensvlakoooreenkoms slegs na 'n aanvangsdatum verwys soos ooreengekom tussen die partye, sonder enige aanduiding oor hoe hierdie ooreenkoms bereik sal word;
 - (v) Dat daar kennis geneem word dat die Wet op Plaaslike Regering: Munisipale Finansiële Bestuurswet nagekom moet word met betrekking tot geskille rakende betalings en die sluiting van enige ooreenkoms;
 - (vi) Dat daar met kommer kennis geneem word dat die konsep-diensvlakoooreenkoms van die Munisipaliteit vereis om 'n rekening by SAPO te open, onderhewig aan die bepalings en voorwaardes van die rekeningaansoek, en geen afskrif van sodanige bepalings en voorwaardes is voorsien nie;
 - (vii) Dat daar kennis geneem word dat die konsep-diensvlakoooreenkoms verder vereis dat die Munisipaliteit 'n deposito van minstens drie (3) maande se gebruikskoste vooruit moet hê, wat teenstrydig is met die MFMA;
 - (viii) Dat daar kennis geneem word dat die konsep-diensvlakoooreenkoms verskeie foute bevat, byvoorbeeld onvolledige definisies, teenstrydighede tussen die hoofooreenkoms en die bylaes of ander paragrawe in die ooreenkoms, foute in kruisverwysings en numeriese foute;
 - (ix) Dat die Munisipaliteit 'n bekommernis het oor die vermoë van SAPO om aan 'n ooreenkoms van hierdie aard en omvang te voldoen, en sorg gedra moet word dat so 'n ooreenkoms nie misbruik word as 'n besigheidsreddingsmeganisme vir SAPO nie;
 - (x) Dat die konsep-diensvlakoooreenkoms verskeie bepalings bevat wat SAPO beskerm teen die uitvoering van sy pligte tydens stakings of besigheidsreddingsprosesse, wat sal veroorsaak dat kennisgewings nie binne die voorgeskrewe tydramwerke gestuur word nie, sonder enige regsmiddel vir die Munisipaliteit vir die gepaardgaande inkomsteverlies;
- (c) Dat na bepaling aan watter van die agt aspekte voldoen of nie-voldoen word nie, en gebaseer op die nie-gereedheid om AARTO te kan implementeer, daar om uitstel aansoek gedoen word om saam met die volgende groep munisipaliteite vir implementering in te skakel, deurdat Swartland Munisipaliteit nie gereed is vir implementering nie, hoofsaaklik weens:
 - (i) gebrek aan begroting omdat die afkondiging midde in 'n finansiële jaar (Augustus 2025) gedoen is, en daar nie voor begroot kon word nie;
 - (ii) die "back office" nog nie gereed is nie;
 - (iii) die nie-beskikbaarheid van Regulasies en enige SOP (*Standard Operating Procedures*); en
 - (iv) die SA Poskantoor wat nie funksioneel is nie en wat tans in sakeredding is;

8.1/...

- (d) Dat die Munisipale Bestuurder met volmag beklee word om 'n brief aan die RTIA te stuur waarin die Munisipaliteit se bekommernisse uitgelig word en waarin dit meegedeel word dat die Munisipaliteit, weens die onsekerhede, nie in staat sal wees om AARTO te implementeer voordat al die aangehaalde bekommernisse aangespreek is nie, dat geen diensvlakoooreenkoms rakende AARTO aangegaan sal word totdat daar duidelikheid oor die uitstaande sake verkry is nie en dat die Munisipaliteit nie bereid is om 'n diensvlakoooreenkoms met SAPO te onderteken nie weens die teenstrydigheid met die MFMA;
- (e) Dat, indien die Stad Kaapstad besluit om 'n interdik te bekom teen die implementering van AARTO met ingang van 1 Desember 2025, dit deur die Swartland Munisipaliteit ondersteun sal word;
- (f) Dat die Uitvoerende Burgemeester met volmag beklee word om 'n skrywe aan die President van Suid-Afrika en die Minister van Vervoer, Barbara Creecy, te rig insake die bekommernisse van die Munisipaliteit m.b.t. die implementering van AARTO met ingang van 1 Desember 2025.

8.2. MEMORANDUM VAN VERSTANDHOUDING MET DIE WES-KAAPSE REGERING: SUSTAINABLE INFRASTRUCTURE DEVELOPMENT AND FINANCIAL FACILITY (SIDAFF) (5/9/2/7)

Die Direkteur: Siviele Ingenieursdienste gee agtergrond tot die *Sustainable Infrastructure Development and Financial Facility* (SIDAFF)-program wat deur die Departement van Plaaslike Regering gekoördineer word. Die doel van die program is water- en sanitasieprojekte van geselekteerde munisipaliteite in een portefeulje saam te voeg om beleggings vanaf groot internasionale befondsingsinstellings te lok wat gewoonlik nie kleiner, individuele projekte sal ondersteun nie.

Die Direkteur: Siviele Ingenieursdienste meld verder dat die Raadgewende Ingenieur, Zutari Raadgewende Ingenieurs, wat deur die Departement van Plaaslike Regering aangestel is, reeds betrokke is by die beplanning van water- en sanitasienetwerke in die Swartland munisipale gebied en dus bekend is met plaaslike omstandighede.

'n Verdere voordeel van die SIDAFF-program is dat dit as 'n vennoot ingebring kan word by die aansoek om BFI (*Budget Facility for Infrastructure*)-befondsing vanaf die Nasionale Regering waarvan die aansoek nie minder as R1 biljoen mag wees nie, gegewe dat ±R2,5 biljoen benodig word vir die opgradering van die totale munisipale waternetwerk.

Die Direkteur: Siviele Ingenieursdienste spreek sy dankbaarheid uit dat Swartland Munisipaliteit gekies is om deel te wees van die SIDAFF-program.

BESLUIT

(op voorstel van rdh T van Essen, gesekondeer deur rdl N Smit)

- (a) Dat die volgende deur die Raad gemagtig word met betrekking tot die SIDAFF-program:
 - (i) Die aangaan van langtermynskuld wat verder strek as die huidige politieke termyn (5-jaar verkiesingsiklus), in ooreenstemming met Artikel 46 van die MFMA;
 - (ii) Deelname aan 'n gesamentlike, inter-munisipaal gepoolde/gemengde finansierings-benadering onder die SIDAFF-program, onderhewig aan behoorlike sorgvuldigheid, bekostigbaarheid en regulatoriese nakoming;
 - (iii) Die Munisipaliteit onderneem om 'n gesertifiseerde afskrif van die ondertekende Raadsbesluit by die Departement van Plaaslike Regering, Wes-Kaapse Regering, in te dien vir insluiting as Aangangsel A by hierdie MoU. Die Munisipaliteit erken verder dat sy deelname aan die SIDAFF-program Fase 3 voorwaardelik is op die indiening van hierdie gesertifiseerde besluit binne 30 dae na ondertekening van die MoU;

8.2/...

- (b) Dat kennis geneem word dat Zutari die voorkeurtenderaar is vir die opgradering van die Swartland Watersuiweringswerke en grootmaat-pyplyn onder die SIDAFF-program.

8.3 VOORGESTELDE UIT-DIE-HAND VERVREEMDING VAN GEDEELTE VAN RESTANT ERF 138, RIEBEEK KASTEEL (12/2/5/2-11/4)

Die firma, CK Rumboll en Vennote, is in 2018 deur die Munisipaliteit aangestel om die onderverdeling- en hersoneringsaansoek van Erf 138, Riebeek Kasteel te behartig. Tydens die opmetingsproses is vasgestel dat 'n bestaande gebou (historiese woning) en bestaande grensheining van Erf 137, Riebeek Kasteel op Erf 138 oorskry.

'n Aansoek is vanaf die eienaar van Erf 137, Riebeek Kasteel ontvang om die betrokke gedeelte (groot 115 m²) van Erf 138, Riebeek Kasteel te bekom.

BESLUIT

(op voorstel van rdl D G Bess, gesekondeer deur rdl A M Booysen)

- (a) Dat, ingevolge Artikel 14 van die Munisipale Finansiële Bestuurswet (Wet 56 van 2003) besluit die Raad:
 - (i) Dat die onderwerp eiendom nie benodig word om die minimum vlak van basiese dienste te voorsien nie; en
 - (ii) Dat die billike markwaarde van die bate en die ekonomiese en gemeenskapswaarde wat vir die bate ontvang moet word, oorweeg is;
- (b) Dat ingevolge die toepaslike verordening sowel as Artikel 14 van die Wet op Munisipale Finansiële Bestuur goedkeuring deur die Raad verleen word vir die uit-die-hand vervreemding van 'n gedeelte, ± 115 m² groot, van die Restant Erf 138 Riebeek Kasteel aan die eienaar van die aangrensende Erf 137 teen 'n verkoopprijs van R28 750.00 (BTW uitgesluit), onderworpe aan die standaard verkoopsvoorwaardes asook die volgende verdere voorwaardes:
 - (i) Dat die proses vir die verkryging van die toepaslike grondgebruiks-/ontwikkelingsregte (d.i. onderverdeling en konsolidasie) deur en op koste van die koper onderneem sal word;
 - (ii) Dat die eienaar, benewens die koopprijs, verantwoordelik sal wees vir alle kostes wat verband hou met hierdie transaksie, insluitend advertensie- en oordragkoste;
 - (iii) Dat die voorgestelde transaksie geadverteer word in die pers vir publieke insette en/of moontlike besware en dat die Uitvoerende Burgermeester (in konsultasie met sy komitee) magtiging sal hê om met enige moontlike besware te handel;
- (c) Dat die volgende redes genotuleer word vir die uit-die-hand vervreemding soos voormeld, sonder om 'n openbare mededingingsproses te deurloop met verwysing na paragraaf 12.1.1 van die Munisipale Bate Oordrag Beleid:
 - (i) Die geïdentifiseerde gedeelte van Restant Erf 138 is reeds funksioneel geïntegreer met Erf 137, Riebeek Kasteel, as gevolg van die bestaande gebou- en grensheinings-oorskrydings, en kwalifiseer dus as 'nie-lewensvatbare bate' aangesien dit weens fisiese beperkings nie sinvol as 'n afsonderlike entiteit binne die ontwikkelingsparameters van die bestaande sonering ontwikkel kan word nie, en dus slegs funksioneel word indien dit, soos voorgestel, aan die aangrensende eienaar vervreem word;
 - (ii) Die verkryging sal die integrasie van die betrokke eiendom met Erf 137 wettig deur die eiendomsgrens te formaliseer, en sodoende konsekwenheid tussen die kadastrale rekords en die werklike gebruik van die grond verseker;
 - (iii) Die bestaande oorskrydingsituasie en enige potensiële grondgebruik- of regsdispute wat moontlik in die toekoms kan ontstaan, sal uitgeskakel word, wat sekerheid vir beide die Munisipaliteit en die eienaar sal verseker.

8.4/...

8.4 KONSTRUKSIE VAN PAAIE IN CHATSWORTH: VOORGESTELDE ONTEIENING VAN GEDEELTES PRIVAATGROND VIR HOEKAFSTOMPINGS (12/2/1-2/4)

Die Raad het in 2022 die verskillende opsies oorweeg vir die oordrag van gedeeltes privaatgrond vir hoekafstompings ten einde die konstruksie van paaie in Chatsworth te voltooi.

Daar is op 'n onteieningsproses besluit wat gedurende 2022/2023 suksesvol deurloop is. Die voorstel is om dieselfde proses vir die 2025/2026 finansiële jaar en daarna te volg.

Die voltooide padontwerpe raak 38 eiendomme, waarvan vyf aan die munisipaliteit behoort. Die vereiste hoekafstompings beslaan gemiddeld ongeveer 12,5 m² en sal nou opgemeet word om finale diagramme voor te berei vir aanhegting by die Onteieningskennisgewings.

BESLUIT

(op voorstel van rdl R Jooste, gesekondeer deur rdl T van Essen)

- (a) Dat goedkeuring verleen word vir die onteiening van daardie gedeeltes privaatgrond wat as hoekafstompings benodig word vir die verdere konstruksie van paaie in Chatsworth, ten einde die onteienings tydens die 2025/26 finansiële jaar te voltooi vir die konstruksieprogram wat voorlê, met inagneming van die kompleksiteit, verhoogde kostes en ander implikasies verbonde aan die normale oordragproses soos toegelig;
- (b) Dat die betaling van kompensasie soos vervat in Aanhangsel A tot die verslag goedgekeur word;
- (c) Dat die geaffekteerde partye vooraf skriftelik in kennis gestel word van die stappe wat geneem en die proses wat gevolg sal word;
- (d) Dat die Direkteur: Korporatiewe Dienste gemagtig word om alle dokumente wat met hierdie transaksies verband hou, te onderteken.

8.4 KWARTAALVERSLAG (ARTIKEL 52 VAN MFMA): JANUARIE TOT MAART 2025 (7/1/2/2-2)

Die voorlegging van die kwartaalverslag aan die Raad word voorgeskryf deur Artikel 52(d) van die Wet op Plaaslike Regering: Munisipale Finansiële Bestuur, 2003 (Wet 56 van 2003).

Die Artikel 52 MFMA-kwartaalverslag bevat ook nie-finansiële inligting in die vorm van die prestasie gemeet teen die teikens in die Topvlak Dienslewering- en Begrotingimplementeringsplan.

Voormelde verslag is oorweeg deur die Munisipale Publieke Verantwoordbaarheidskomitee (MPAC) op 28 Oktober 2025 vir aanbeveling aan die Raad.

BESLUIT

(op voorstel van rdl E C O'Kennedy, gesekondeer deur rdl D C Pypers)

Dat kennis geneem word dat die kwartaalverslag op 28 Oktober 2025 by die MPAC ter tafel gelê was en dat die MPAC, by wyse van verslagdoening aan die Raad, aanbeveel dat die Raad kennis neem van die kwartaalverslag, soos voorgeskryf deur Artikel 52 van die Wet op Munisipale Finansiële Bestuur, Wet 56 van 2003 ten opsigte van die implementering van die begroting sowel as die prestasie teenoor die Topvlak Dienslewering- en Begrotingimplementeringsplan van die Munisipaliteit vir die periode 1 Julie 2025 tot 30 September 2025.